

Allannguutissatut siunnersuut

uunga

**Ilinniagaqarnersiutit pillugit Inatsisartut inatsisissaattut siunnersuut**

Aappassaaneerneqarnissaanut Naalackersuisunit saqqummiusaaq.

§ 14-mut

**1. § 14, imm. 3, ima oqaasertaqassaaq:**

”Imm. 3. Naalackersuisut ilinniagaqartullu kattuffiisa tamanna pillugu sioqqusumik isumasioqatigeereernerisigut stipendiat taarsigassarsiarineqarsinnaasullu annertussusissaat, ikaarsaariarnermi aqqissuussinerit aamma immikkut aningaasaliissutaajunnartut annertussusissaat aningaasanut inatsimmi aalajangersarneqassapput.”

§ 15-mut

**2. § 15, imm. 1, ima oqaasertaqassaaq:**

”§ 15. Sulisitsisunut tapiissutit amerlassusissaat, tak. § 13, aningaasanut inatsimmi aalajangersarneqartassapput.”

§ 31-mut

**3. § 31, imm. 1, ima oqaasertaqassaaq:**

”Imm. 1. Tapiissutit ukiup akilersuiffiup ingerlanerani akiliutaasimasut nalinginik amerlassuseqartinneqartassapput.”

**4. § 31, imm. 2, peerpoq.**

Tamatuma kingorna imm. 3, 4 aamma 5 2, 3 aamma 4-nngussapput.

Inatsisissatut siunnersuummut oqaaseqaatit

**Oqaaseqaatit nalinginnaasut**

Allannguutissatut siunnersuut saqqummiunneqarpoq Kultoreqarnermut, Ilinniartitaanermut, Ilisimatusarnermut Ilageeqarnermullu ataatsimiititaliap inassuteqaatai inatsisissatut siunnersuutip aappassanneernejarnissaanut ataatsimiititaliap isumaliutissiissutaani.

Inatsisartut ilinniagaqarnersiutit aamma sulisitsisunut tapiissutinut aningaasaqarnermut inatsit aqutigalugu aalajangiisuuginnarnissaannut siunnersuummik allannguutissamut tunngatillugu oqaatigineqassaaq ullumikkut aaqqissuussinermik ingerlatitseqqiinerummat, taamaattumik allannguutit aningaasaqarnikkut aqutsinikkulluunniit kinguneqartitsinaviangillat. Illoqarfinnut nunaqarfinnullu ilinniagaqarnersiutinik akiitsunik akilersuinermit tapiissutaasartut assigiinngissutaanut tunngatillugu 2009-mi 2010-milu nunaqarfinnit isorliunerusuniillu qinnuteqaatinik tigusaqartoqarsimangilaq, taamaattumik allannguutissaq taanna aamma aningaasaqarnikkut kinguneqartitsinaviangilaq.

### **Inatsisissamut siunnersuummi aalajangersakkanut ataasiakkaanut oqaaseqaatit**

#### *Nr. 1-mut*

Aalajangersagaq Inatsisartut ilinniagaqarnersiutit pillugit peqqussutaanni atuuttumi § 4, imm. 2-mik ingerlatitseqqiineruvoq, soorlutaaq Naalakkersuisut Ilinniaqaqartullu Kattuffii stipendiat taarsigassarsiallu annertussusissaannik aningaasanut inatsimmi aalajangiisoqartinnagu isumasioqatigeeqaartarnissaanut aalajangersakkat ingerlateqqiinnarneqarnissaat siunnersuutaasoq.

Taamaattumik Ilinniagaqartut Kattuffii nalileeqaataanissamut periarfissaqarput, soorlutaaq Inatsisartut aningaasanut inatsimmi namminersorlutik stipendiat taarsigassarsiallu annertussusissaannik naleqqussaasinnaanerat kalluarneqarnaviangitsoq.

Aalajangersakkap malitsigissavaa, ullumikkut aaqqissuussinerup, soorlu aamma 2011-mut aningaasanut inatsimmi atuuttoq, ilinniagaqarnersiutit annertussusissaasa oqaasertaliinikkut aalajangerneqartarnerata, ingerlatiinnarneqarnissaa. Taamaattorli aalajangersagaq akornutaannaviangilaq Naalakkersuisut atuakkanut, bussinut qimuttuitsunullu aningaasartuutitut procentikkaartumik tapiissuteqartarnissaasa malittarisassiornissaannut.

#### *Nr. 2-mut*

Aalajangersakkami allaqqavoq sulisitsisunut tapiissutaasartut annertussusaat Inatsisartut oqartussaaffigaaq. Nalinginnaasumik ilinniagaqarnersiutit assigalugit sulisitsisut lærlingiutillit ilinniagaqarnersiutit annertussusissaat aningaasanut inatsimmi aalajangersarneqartarput sulisitsisunut akissarsianut tapiissutitut, soorlutaaq aningaasanut inatsimmi atuuttumi taamaattoq. Assersuutigalugu 2011-mut aningaasanut inatsimmi allaqqavoq sulisitsisunut akissarsianut tapiissutit sulisitsisut ukiumi siullermi lærlingiuteqarnerminni tapiissutisiaat kr. 4.370,-iusoq, taamatullu ukiumi tulluuttuni tapiissutit nalimmassarneqartartut apeqqutaalluni ilinniagaq sorleq ingerlanneqarnersoq.

#### *Nr. 3-mut*

Aalajangersagaq isumaqarpoq sumi najugaqarneq aallaavigalugu immikkoortitsisarneq atorunnaassasoq. Aalajangersagaq isumaqarpoq ilinniagaqarnersiutitut akiitsunik akilersuinerneq assigiimmik tapiissuteqartoqassasoq apeqqutaatinnagu qinnuteqartup suminngaaneerna.